



# 3 di Avrîl, la Fieste de Patrie dal Friûl



Une fieste che e ten dongje storie, atualitât e avignî. E je la «Fieste de Patrie dal Friûl», che e vignarà memoreade ancje chest an cuntune schirie di iniziativis tra la fin di Març e lis primis dôs setemanis di Avrîl.

La date uficiâl de «Fieste de Patrie» e je chê dai 3 di Avrîl, par vie che juste in chê di, tal 1077, l'imperadôr Indri IV i deve al patriarcje di Aquilee Siart il titul di «Comes Fori Julii, Dux et Marchio». Cun chê invistidure il patriarcje al cjapave sù il podê «temporâl», ven a dî chel «politic», e il Patriarcjât di Aquilee al diventave, inte suaze dal Imperi, un «stât» par so cont. Chel moment si pues calculâlu une sorte di «at di nassite» dal Friûl, intindût tant che comunitât teritoriâl unitarie, tant che «Patrie», cemût che al vignarà clamât par tancj secui. Cun di fat, chê situazion politiche e istituzionâl e marcarà la sô unitât storiche e gjeografiche dutun cu la sô specifiche pluralitât linguistiche e culturâl e in cheste suaze cu la peculiaritât e cu la unitarietât de lenghe furlane. Cun di plui, propit in chel contest, il Friûl al disviluparà une rê di relacions cun diviersis zonis de Europe, sei inte direzion nord-sud che in chê est-ovest.

## I 940 agns de Patrie e i 40 agns de Fieste

La «Fieste de Patrie dal Friûl» no je une ricorence ni di nostalgjie, ni di mitologjie. Il riferiment ae Ete di Mieç, al «stât» patriarcjâl e salacor ancje ae sôs istituzions - a tacâ dal Parlament, screât ai 6 di Lui dal 1231 e par chel ricognossût tant che un dai plui antîcs de Europe - al tocje soredu il Friûl contemporani e chel di doman. Al è cussi in dî di vuê, cemût che si lei ancje tal test de leç regional 6/2015, che doi agns indaûr e a istituît la Fieste in maniere uficiâl, e al jere cussi tal 1977, cuant che a Aquilee si faseve la sô prime celebrazion, propit cun chê di promovi la identitât e l'autoguvier dal Friûl, daûr dal sburt des rivendicazions saltadis fûr cuntune fuerce gnove dopo dal taramot a tacâ des esperiencis di partecipazion e di autogjestion di chel timp de int des comunitâts locâls.

Propit chel spirt, ancje se si palese cun ategjaments diferents che a van daûr des specificitâts dai diviers sogjets che vie pai ultins cuarante agns a àn memoreât la «Fieste de Patrie dal Friûl», al è il caratar di fonde des tantis manifestazions inmaneadis vie pai ultins cuarante agns pal inovâl dai 3 di Avrîl.

La Fieste de Patrie e je une ocasion di riflessione, di cognossince e di condivison. Par resonâ in cont dal Friûl di vuê e dal so avignî, de sô pluralitât linguistiche e culturâl e de sôs relacions cul rest de Europe e dal Mont. Par cognossi e ricognossi la dimension teritoriâl unitarie dal Friûl, la complessitât de sô storie e de sô



identità e la impurtance des sôs diversis specificitàs. Par spartî ideis, cognossincis e cussience.

## **Fieste di ducj, fieste dapardut e apontament speciâl a Sapade ai 2 di Avrîl**

Il cûr des celebracions de Fieste de Patrie di chest an al è il program di events che si fararà domenie ai 2 di Avrîl a Plodn/Sapade. Al è un comun dal Friûl che nol fâs part de Regjon autonome Friûl-VJ e che la sô particularitât culturâl plui significative e je il *plodarisch*, la antighe varietât linguistiche todescje sapadine. E salacor, propit par dut chest, al rapresente inte maniere miôr la idee di unitât, di pluralitât e di vierzidure che e je la fonde de Fieste.

A tacâ di dîs a buinare a saran une cerimonie civil e une religiose e diviers moments di culture e di socialitât, ducj cuancj marcâts dal ûs des cuatri lenghis dal Friûl (furlan, sloven, todesc e talian). A trê e mieze dopo di misdi e je proviodude ançe la conclusion de prime edizion de Stafete des lenghis minoritariis dal Friûl, une corse inmaneade cun chê di promovi il pluralisim linguistic e la tutele des minorancis, che la sô partence e sarà a Udin te buinore di sabide il 1n di Avrîl.

La Fieste de Patrie e vignarà memoreade in diviers comuns dal Friûl cun incuintris, conferencis, spetacui e fintremai cun proiezioms



di cines tant che «Friûl Revolution», la opare sureâl dai Cjastrons presentade in antepreme dentri dal festival Suns Europe, e cun concerti: par esempli chel che si fararà ai 7 di Avrîl a Udin. Cun dut che e je la fieste dal Friûl intir e no dome di chel di lenghe furlane, il coordinament di dutis chestis iniziativis al è par cure de ARLeF, daûr des previsionis de leç regionâl 6/2015, e diviers apontaments tai paîs a vignaran inmaneâts de bande de Assemblee de Comunitât linguistiche furlane.

Compagn che tai agns passâts l'inovâl dai 3 di Avrîl al vignarà memoreât ançe de bande dal Friûl che al è «pal mont». Une Fieste che e je par ducj e par une Patrie che e je di ducj, inclusive, plurâl e rispjetose. Une Patrie che par chel no à ni agjetifs ni etichetis: no je ni «piçule», ni «extralarge».

Dut il program de «Fieste de Patrie dal Friûl» si cjate tal sît web de ARLeF: [www.arlef.it](http://www.arlef.it).



**Marco Stolfo**

**Par informazioms:**  
[www.arlef.it](http://www.arlef.it) - [arlef@regione.fvg.it](mailto:arlef@regione.fvg.it)  
tel. 0432/555812

Par cure de:

**ARLeF** AGENZE  
REGIONÂL  
PE LENGHE  
FURLANE